

ЛҰИМА СЭРИПОС

10 мая
2019 года
№9
(1195)

Общественно-
политическая газета
Ханты-Мансийского
автономного
округа-Югры

www.khanty-yasang.ru

E-mail: gazeta@khanty-yasang.ru

Основана 11 февраля 1989 года



Хурит Юлия ос Виктория Боженко мӧлтӱ тӱлт пӧслувӧсыг. Тӧн акитӧн Александр Васильевич Алгадьев Ленинградский областит 1942 тӱлт хӧнтлым порславес. Ты мӱнӱщи хум ос тав рӱт мӱхманӧ урыл 7 лӧпсыт ловиньтӧн.

Л. Теткина вӱрум хури

Ты
номерт
ЛОВИНЬТӢН:

Ты рӱпатав
мӧт щирыл
вӱрунӱкве эри

3

Тӱн хӧнт
юи-пӱлт
нӱврамыт
ханищтасыт

6

Мӱнӱщи нӧт
Тихвин ӱсн
ялсыт

7

Тӱн хӧнтлам
рӱтаныл урыл
потыртасыт

12

Ты лӱтнӱл
туп 300 хӧтпа
потырты

14

ЛҮҮХХАЛЫТ

Мошщал ойтнэ хөтпат олнаныл нөх-нөтавет

Мирн пёриим махманув касын аквитит этпос яныг сапранин акванатхатыглэгыт, мир олупсаныл ёмасыг вярнэ магыс эрнэ сакконыт пирмайтэгыт. Ань яныгполь этпос оигпан порат ват нупыл нёлоловит щёс акван-ёхталасыт.

Овлёт бюджет-олныг урыл потырта-сыт. Ань 300 млн солкөви мөлтү талныл хулыт-сыт, тананылтыл пүльницан эрнэ утыт ёвта-вет. Ос 200 млн солкөви лёккарытн ос пүльницат рүпитан махумн юстамыг ойтает.

Государственный учрежденият рүпитан махум магыс ос ёмас саккон пирмайтавес. Ты элы-палт рүпата кұщайт шар мошщ-цаг ловиньтан юстам хөтпан ойтсыт, ань ты коньпал тув «север-ный» ос «районный» олныт ловиньтаңкве лававет. Ты хосыт хөт-па иң савнувел ойтун-кве патаве.

Ман округувт ты тал Щёмыя янытлан талыг лаввес. Манху-рип нётмилыл щёмыят варавет, та урыл мирн нётмил вярнэ депар-таментыт кұщайг рү-питан нэ Светлана Да-виденко депутатыт элы-палт потыртас. Няврамын щёмыят ок-ругувт ват нупыл ху-рум савсыр нётмилыл мивет, пособие-олныл ойтает.

Мөлтү 2018 талт 69 сөтыра 169 колтаглыт тув хансым олсыт, тан 141 070 няврам янмал-тэгыт. Ты тал овылта-там пасныл ойтнэ по-собият ос савсыр олныт 4 % нөх-нөтвёсыт. Ман округувт щань-ащтал хулытум манос люль-саң онычим 7 сөтыра 993 няврам олы, тан

халаныл төват мөт щёмыян вуйвёсыт ос ёмшакв янмалтавет.

Ос ань щёмыян ви-нэ кастыл 32 няврам хансым олы. Тан ма-гысланыл ань щань-ащит тинсавет, эрың хотьют тантинаныл савалапыг хулытум няврамакве выг. Ты агиришит ос пыгри-шит урыл мир вос ваганыл ос танти щё-мыяныл эрың олуңкве выганыл.

Савалап няврам Ставки палтэ винэ элумхөлас өвлёт савсыр кұщайтын хаништаве, потыртаве, тувыл уш ровнэ нэпакытыл миве ос няврамакве виңкве таратаве. Руш щирыл ты хаништап тох ла-ваве — «система под-готовки замещающих родителей».

Сав няврамын щё-мыят ань ос савыг ёмтсыт, округув яны-тыл ты 30 сөтыра арыг-тем колтаглыт. Тан ол-нэ коланыл магыс ол-нойтнэ олн акв палэ ю-вле миве, школан мин-нэ порат нявраманыл эрнэ пормасытыл ёв-тнэ магыс акв щёс ол-ныл таставет, хөт тал мус яныгман нявра-мыт пүльницат тэрпил олнтал хансавет, куль-тура ос спорт колытын этпос акв щёс тув олн ойттал ялуңкве рөви.

Школат ханиш-тахтын няврамыт ос олн ойттал тэнутыл тыттавет, щанит-ащит тув олн ат ойтэгыт. Са-



Округ-Дума ишхипың
лопсэт-вим-хуриянув

дикн ялантан няврам магыс ос сав олн ой-туңкве тананылн ат эри. Тыи ос мөт вярма-лит урыл кұщай нэ по-тыртас, тананыл нан мирн нётмил вярнэ департаментыт ло-виньтаңкве вөрмегын.

Яныг махум ос няврамыт права-ныл ўргалан нэг Ната-лья Стребкова ос Татья-на Моховикова мөлтү тал вярум рүпататэн урыл потыртасыг. Ня-врамытын нётнэ нэ Та-тьяна Моховикова пот-рёт хансым олы, сossa мир Ассамблеят рүпи-тан депутатыт тавен акваг нётэгыт, элн ол-

нэ интернатыт ос шко-лат аквёет уральтыя-ныл.

Хальёс район Куль-пас павылт 2007 талт интернат-кол ўнт-туңкве овылтавет, ос акв порат шар хот-оссувлалвес, тувыл 2018 талт ўнттын маңыл аславет ос няврамыт тув вантлуптаветсыт. Ань школаныл ос сака пёсыг ёмтыс. Миркол кұщайт эрнэ нэпакыт атуңкве лаввёсыт, мо-шёртын йильпи школа ўнттуңкве патаве.

**Галина
КОНДИНА**

ЛҲХХАЛЫТ

Ты рӯпатав мот щирыл вәруңкве эри



Галина Решетникова



Татьяна Гордеева янытлаве

Округ янытыл ляххал тотнэ махум «Информационный мир Югры» намба сапрәнин акван-атыглавёсыт. Ты тәл янытпөлэ этпос 17-18 хоталыгт вәрыглавес, ос ханищтап «Цифра близко» намаим олыс.

Ань олупсав шар Амот щирыг ём-тыс, ман туп ищхипың утыт хосытыл савсыр тәланув вәриянув. Телевидение, рәтива, газетатт ос ищхипың ут хосыт ляххал тотнэ махум тәнки рӯпатаныл махыг элалъ вос тотыяныл, ты урыл потыртасыт ос тән ты тәлат вә-нэ хотпатн ханищтавёсыт.

Өвләт мүй махум ёт округ кӯшай нә Наталья Комарова пащалахтас. Тав лавыс, ань янге-мәне савсыр потырт кинсым туп олэ-гыт, ляххал - аквтуп тән лылыёпаныл. Таимәгыс манавн потырт ёмщакв хәсым хансуңкве эрэгыт.

Тувыл кӯшай нә яныт касылт нөх-патум ляххал тотнэ хотпат мүйлупсал мисанэ. Ань «Легенда журналистики» яныг намыл Галина Решетникова Сургут усныл майвес.

2018 тәлт шар мак ёмас журналистыг Татьяна Гордеева, «Югра» намба телерадиокомпаният рӯпитан нә, лаввес.

Татьяна округт олнэ соса махумн пумащипа латың кётыс, тән олупсаныл овылтыт номсым тав кәркамыг рӯпиты.

Маньшиләтңыл ляххалыт тотнэ хотпат халт «Юный корреспондент» намба касылт Ханты-Мансийск үст олнэ аги Олеся Т. мүйлупсал майвес. Ос «Десятилетие детства» номинацият «Югория» телекомпаният рӯпитан нә Татьяна Меровя нөх-патыс.

Тувыл кит хотал сыс савсыр ханищтапыт вәрыглавёсыт. Овыл хоталт Алексей Шипилов, губернатор вәнын хум, ляххал тотнэ кӯшайт акван-атыгласанэ. Тән «концепцияг» лавнэ нәпак урыл потыр хунтлысыт ос ты хосыт элалъ рӯпитаңкве лавхатсыт, ётыл яңк нәтнэ этпост ос акван-атхатыглэгыт, ты эрнэ нәпак пирмайтияныл.

Ань ляххалыт пил-тәлыг мирн хумус потыртаңкве ос манхурип хурит манос видео суссылтаңкве рөви – ты урыл полиция ос

мир үргалан кӯшайтн ханищтавёсыт. «Терроризм» пилыщмаң нак урыл потырт мори хансуңкве ос махумн потыртаңкве шар ат рөви. Төванакт махум наскәсыг пилуптавет, аргён люль хури хонтэгыт ос мирн суссылтыяныл. Тащир шар ат таи вәруңкве, пилыщмаң тәлат полиция ос мир үргалан хотпат ёт акван-потыртахтым вәруңкве эрэгыт.

Савсыр хаснэ ос спотыртан ляххалыт урыл Москва үсныл ёхталам кӯшайт потыртасыт. Ань хот-әти олнэ мирыт ляххалыт пуссын ищхипың ут хосыт ловиньтэгыт.

Махум хотты колн агтэгыт, таит хотал сыс пуссын потраныл ловиньтыяныл. Та рӯпитан колыт лап ат пантавет, тән олн тәнки сэлэгыт. Мот колыт тән нупыланыл рөвлахтым тәнки магсыланыл савнун хотпа кинсэгыт, төванакт ат олыглам тәлат ляххалыг хансумтыяныл, пумыщ хури тув вәрапегыт. Та юипәлт ляххаланыл сав махумн та сунсавет.

Ищхипың мәт тамле ляххал сав олы. Ос тәлат солъ олсыт ман әти, туп элалъ кис-

хатнэ ос хәснэ хотпан уральтаңкве вөрмавет. Ань ты овылтыт Илья Бер хум потыртас. «Фейк» - тьи урк ошнэ ляххатыт, журналистат сыресыр йильпи ләтңыт ханищтасыт. Мот ханищтан хотпатныл «подкасты» ос «лайки», «мемы» урыл савнун вәңкве патсүв.

Россия янытыл телевидение «цифровой формат» щирыл рӯпитаңкве тах паты. Рәтива хосыт ляххалыт коныпал мот савсыр передачат вос олнувыт.

Мәләтңыл ос тән овылтыт ляххалыт тотнэ хотпат, янас акван-атыглавёсүв. Өвләт «Лүимә сәрипос» газетав 30 тәләт төвлум кастыл кӯшайт янытлавесүв ос мүйлупсал майвесүв.

Тувыл рӯпатав хумус мұсхалыг элалъ тотуңкве патылүв, ты овылтыт межэтнический журналистика Гильдият кӯшай нә Маргарита Лянге потыртас.

Мән ань ошнэ ищхипың ут хосыт ляххал тотнэ лөпсув «Ханты Манси мир» тох намтылув ос тот мощ мот щирыл рӯпитаңкв патэв.

**Тамара
МЕРОВА**

Вас пәтлуптан пора ёхтыс

Округ охотинспекция кўщай ваңын хум Алексей Залибеков вас пәтлуптан урыл потыртас. Тав лавме щирыл, ань мән мавт өлнэ онтырсат нупыл акв вораан элумхөлас хансым ылы. Тананыл уральтым «Природнадзор Югры» организацият яныгсат нупыл акв инспектор-хөтпа рүпиты.

Кўщай хум лавыс: «Вораан хум такви нәпаке уральтан мағыс инспекторн миңке ат ке кәсаши, тав тара пуваве ос эрнэ нәпаканэ, вораан пүтөвкәтэ ос писале хот-вие».

Ты пора округувт «Пернатая дичь» наппа уральтан вәрмалъ вәраве. Инспектор-хумыт вораан мāt уральтаңке ыылтасаныл. Округув мāt хурум пора щирыл ләкквә-уртвес. Алы мāt яңк нәтнэ этпос 3 хөталныл 12 хөталэ мус вас пәтлуптан пора ёмты. Мөт мāt яңк

нәтнэ этпос 10 хөталныл 19 хөталэ мус ос лүймāt өлнэ махум мағыс яңк нәтнэ этпос 17 хөталныл 26 хөталэ мус вас пәтлуптан пора ёмты. Йис мāt өлнэ соса махум танки мағысыланыл ос тал палыт вораанке таратавет.

Вас пәтлуптан порат ватахкем инспекторыт мāt ургалым яласаңке патэгыт. Тән моторхәпыт, машинат, матыра̄ти пуссын ыныщегыт. Ат рөвнэ мāt вораан хөтпат молях юил ёхтыяныл. Округувт вөрт нәй нөх-пәламлан вәрмалъ

яныгпөль этпос 26 хөталныл тақыщ уральтаңке патвес. Ты урыл мāt-вит ургалан кўщай нә Виктория Четина потыртас.

Тав лавыс: «Вораан хөтпат ос вөрт матыр рүпата вәрнэ махум вәтихал уральтаңке патавет. Ань тосам пум пәламтаңке шар ат таратаве. Тувыл тәлың ййвыт яныгман ляпат, нәйтэмт, тунраң мāt ос норыт яктын мāt араш мори пәлтүңке ос ат рөви. Араш пәлтнэ элыпәлт мāt мұвлахи хотхилүңке эри, нәй элалъ ул вос минас. Вөрт нәйиң хохса, щеранка ос порс мори ул пәхвтән.

Нән нәй харыгтан утанын пуссын акв мāt ыныщән. Матыр пәламлан порат тананыл молях алмаяңке вос вөрмысаныл. Өлнэ манынт

ёл-патум тосам ййвыт акван-атән. Молях нөх-пәламлан пормасаныл ос ёмшакв уральтым ыныщән. Хотты мāt тәнэ нәй кәсалэгын ке, ты телефон хосыт свонитән 8-800-100-9400 тот ты урыл лавән ос тәнэ мāt хүлтэлын».

Элумхөлас вөрт нәй нөх-пәламты ке, тав штраф-олныл хансаве. Тамле хөтпа 3 сөтыра солкөви ойтүңке лававе. Матыр рүпата вәрнэ предприятие ос 200 сөтыра солкөвил паттаве. Ос тав нәй нөх-пәламлан пора урыл вәг ке, 5 сөтыра солкөвил штраф-олныл миве. Вөрт матыр рүпата вәрнэ хөтпат ос атсат сөтыра солкөвил ойтхатүңке яратавет.

Хөтпа нәй мори пәламтанэтэ паттат сав йив ёсвес ке, тав сутытаве ос турманколн үнтүңке вөрмаве.

Николай МЕРОВ

«Сөрни сәй» наппа мән ялсыт

Хальүст нәпак ловиньтан колт рүпитан хөтпат ань «Согласие с природой» наппа проект щирыл рүпитэгыт. Тән нйврамыт мағыс суссылтапыт вәрыглэгыт, мāt-вит урыл хансым савсыр пұмыщ нәпакыт суссылтэгыт ос касылыт щөпитәлэгыт.

Мāt-вит ургалан мāt-хум танки рүпатаныл урыл потыртаңке тув вәтихал ос вөвыглыяныл. Ты рүпата вәрим, тән агиришит-пыгришит мāt-витув янытлаңке ханищтыяныл.

Мәньпөль этпос ойгпам элы-пәлт нәпак ловиньтан колт рүпитан хөтпат Хальүс школат 6 «В» классыт ханищтахтын нйврамыт щәняныл-әщаныл эт «Сөрни сәй» наппа үщлахтын мән ләглыл ялсыт.

Ты үщлахтын мāt Хальүсныл сат вөрыс-

тат ылы. Махум алпыл атхатасыт ос «Сөрни сәй» наппа мāt нупыл минмыгтасыт. Ләңх хосыт ёмманыл порат тән вөр ёмшакв сунсыгласыт, хоты үйришит, товлыңуит та вөрт өлэгыт ос манырсыр пилыт, ләхсыт туй порат тот яныгмөгыт, та урыл нйврамытн потыртасыт.

«Сөрни сәй» үщлахтын мән ёхтум мүй махум ёмшакв тыттувөсыт ос соса мырыт ёнгилытыл ёнгалтавөсыт, мәньшит ос хантыт пөс йис вәрмалъ-



ныл урыл потыртавөсыт. Үщлахтын мāt тән акв эт хүлсыт ос китыт хөталэт аквта щирыл ләглыл Хальүсн ёмантасыт.

Нйврамытын ос тән щәнянылн-әщанылн тамле үщлахтын хөталсака мұстыс. Тән лавсыт, ләглыл ёмманыл порат, ёмшакв сунсыглахтасыт ос ханищ-

тан хөтпат өлнэ маныл урыл потраныл хүнтлым савнув пұмаш вәрмалит ваңке патсыт. Нйврамыт ты үщлахтын мән ялуңке ань ос вөвхатэгыт.

**Марина Табун,
Хальүс библиотекат
рүпитан нә, кетум по-
тре мәньщи ләтңыл
Л. Теткина хансытә**

Пыгыт пёс щирыл пёрщункве ханищтыянэ



Е. Р. Кельмин котилът люли



Егор Романович Кельмин Сургут
Ёуст олы. Ты ханты хум «Пупикат»
нампа пёршин кол тот оныщи. Тув
савсыр тал яныт махум ханищтахтуңкве
ёхталэгыт.

Ты тўяг Сургутский район Русскинская павылт салың махум акван-атхатыгласыт. Тав ханищтан нявраманэ ёт ос тув ёхталас. Тән тот пёрщисыт ос мот касылыл кассыт.

Ты каснэ колн хотсат арыгтем савсыр тал яныт агит-пыгыт ос яныг хотпат ялантэгыт. Маныщи ос ханты махум коньпал мот латңыл потыртан хотпат ос ханищтахтуңкве ёхталэгыт. Няврамытн ты касыл сака пумыщ. Тот катыл ос лаглыл ўргалахтын коньпал, касайл, йивовлыл, сувыл, тыньщаңыл, йив товыл, маньхапыл, тупыл ос мот утытыл махум касуңкве ханищтавет.

Хум Тобольск ўс педагогический институт асталас. Та ўст олме порат тамле каснэ вармаль урыл хўнтамлас ос ханищтахтуңкве патыстэ. Ты касыл «Пупикат» намыл такви

намтыстэ. Пёс порат ханты ос маньщи махум тәнки олнэ мананыл ўргалым ошсаныл. Пёх хотпат тув ат тартыглалсаныл, воряян, хул алышлан мананыл акваг вуянтасаныл, тиймагыс алхатуңкве ханищтахтасыт. Тувыл ётыл ты алхатнэ вармаль хотёрувлалвес. Ань ханты хум ты касыл нохвормалтастэ ос элалэ тотуңкве патыстэ.

Егор Романович лавыс: ««Пупикат» ханты латңыл толмашлаңкве ке, «маколыңойка кат» тох лававе. Ты пёршил сав тэла щирыл янас ханищтаве. Воруит, товлыңуит акван-пұхтынэныл порат, хумус тән пёрщэгыт манос тыталахтэгыт, та щирыл махум ханищтыяну. Хотты элумхоблас нән нупылын алхатуңкве патыке, таве молях ёлпаттуңкве ос ротмалтаңкве рови».

Ты хум Сургутский район Угут павылт самын патыс. Тот яныгмас ос школа асталас. Тав атятэ нййтыг олыс. Хунь тав атимыг ёмтыс, яныгпала ханты хотпат сапрани вэрыгласыт.

Няйт элалэ тотнэ магыс тән Егор паттуңкве тахсыт кос, ос Егор тонт комсомольцыг олыс, ты вармаль элалэ тотуңкве ат касащас. Тувыл та торыг тав путёвка-нэпакыл майвес. Пыг Татарстан мән Набережные Челны ўсн кётвес. Тот «Камаз» нампа машинат вэрнэ магыс яныг кол ўнттувес.

Тот матахмат этпос рўпитас, павлэныл тав палтэ хўрум ханты хум ёхтысыт. Ты 1973 тал олыс. Егор лэвыльтавес, манрыг тав сытамыг тўйтхатым ми нас. Пёс вармаль щирыл тох ат рови.

Та порат тән акванпотыртахтасыт, тав пентсылэ ащойкатэ нййт хотпаг паттувес. Ос Егор олупсатэ элалэ мўсхалыг вос ми нас, Торум ащ тав

нупылэ ул вос кантлыс, таимэгыс тав та порат яныгсат сотыра солковил ойтхатуңкве лаввес. Манылат пыг ты олныт пуссын ойтсанэ.

Ос ам таве китыгласлум, хотыл та порат тав тысавит олн хонтыс. Ойка лавыс, тонт тав тэrvитың пормасыт нох-алмын магыс кёрквалгыт сагим рўпитас, тот сав олныл ойтывлавес. Ты рўпата туп мащтыр хотпа вэруңкве вэрми. Тэн тот кит хотпа ты рўпата вэруңкве хассыг, тэн сас ёмщакв ойтвэсыг.

Ань хум пенсият олы. Хоты мат каснэ вармаль щёпитаве, тав ханищтан нявраманэ ёт акваг тув яланты. Тән ватихал нох-патыглэгыт. Егор Романович сосса мир магыс эрнэ рўпата вэри, няврамыт каснэ вармальн ханищтыянэ, тән элалэ ёмас хотпаг яныгмэгыт. Мән тавён пустэгыл олнэ латың кётэв.

**Николай
МЕРОВ**

9 МАЙ — ПОБЕДА ХӨТАЛ!

Тән хөнт юи-пәлт нъяврамыт ханищтасыт



В. Е. Попов



Г. И. Попова Владимир ойкатәнтыл

Нёлсәт сәвиткем тәл ювле хультум порат самын патум хөтпат пылыщмаң хөнтлын накн ликмыгласыт. Та яныг хөнт өлүм порат агит-пыгыт ханищтахтаманыл юи-пәлт сәвсыр рүпата вәрсыт.

Төнт школат сака тәрвительныг олыс. Ловиньтан ос хаснэ нэпак ат төвылхатас. Школат найпос атим, төва ўсытыт күр пәлтыглаңкве нэ матарыл олыс. Ащирмаң порат тох та ханищтахтасыт. Хөт-ати писалъ суй кургатәнтыглас. Тән та пылыщмаң порат акв-тупмат молях янгыг ёмтсыт. Нъяврамыт пуссын хөнт өлүм вәрмалъ ёмщакв вәсаныл.

Война элы-пәлт ос та юи-пәлт самын патум хөтпат ос хөнтлам ма-хум ань сака мощща хультыс. Кәсың тәлныл

тән мощщамёгыт. Та хөнтлын нак урыл сәвн-нуп потыр ты хультум хөтпатныл ань хансуңкве ты эри. Мир ты хөнт урыл сәвнуп вос вәгыт.

Ты порат Нъярихумит пәвыл школат нъяврамыт ханищтам хөтпат ань иң өлэгыт. Тән яныг хөнт юи-пәлт пәвыл школат нъяврамыт ханищтасыт. Ты учителит урыл нъяврамыт ханищтан нэ Лариса Карпенко ос та-вен нётмил вәрнэ агит-иг Катя Л. ос Алиса П. потыртасыт.

Нъярихумит пәвылт маңь школа 1928 тәлт

рүпитаңкве овылтахтас. Тот 1960 тәлт нъяврамыт сәт класс мус ущ ханищтаңкве патвёсыт. Ань төва хөтпат урыл хансэв.

Нина Алексеевна Лыс-кова 1944 тәлт Октябрьский район Калтысяны пәвылт самын патыс. Аятэ ханты хум олыс. Хөнтлын мāt порсла-вес. Оматэ ос маңьщи нэ, тав сәвсыр рүпата вәрыс. Нина Алексеевна Ханты-Мансийск ўс педучилище а́тлас. Тав Нъярихумит пәвыл маңь школат нъяврамыт руц ләтңын ос литературан ханищтасанэ. Ань тав наука магыс сәв рүпата вәри.

Галина Иосифовна Попова 1930 тәлт самын патыс. Хөнт овылтахтам порат тав аквхуйплов тәлэ төвлыс. Тувыл Ханты-Мансийск ўс педучилище а́тлас. 1952 тәлт тав Нъярихумит пәвыл школан рүпитаңкве кет-вес. Ты мұтраң нэ нъяврамыт ёмас хөтпаг олуңкве ханищтасанэ, сәв тәл тот рүпитас.

Владимир Екимович Попов 1935 тәлт Ханты-Мансийский район Елизарово пәвылт самын патыс. Хөнт овылтахтам

порат тав хөт тәлэ төвлыс. Пыг школат сәт класс а́тлас. Тувыл элаль киномеханикыг ханищтахтас. Маңьлат порат кәтыл нётнэ хурит пөслыс ос баяныл ёнгүңкве хәсыс.

Ты хум эргыт эргүңкве, кәтыл хурит пөслуңкве ос матыр пормасыт мащтырлаңкве нъяврамыт школат ханищтасанэ. Тувыл агит ос пыгыт ёт сәвсыр суссылтапыт щёпитәлыс.

Ты рүпита́м хөтпат пәвылт ос школат акваг номавет. Тән ханищтам төва нъявраманыл ань ос школат рүпитэгыт.

Ты хөтпат коньпал сәв тәл Нъярихумит пәвыл школат Н.П. Карска-нова, Е. С. Анкина, Н. А. Воложанина, Л. П. Пле-ханова, З. П. Воложанина, В. Е. Смолина, С. Д. Фо-мина, Г. А. Гарчинская ос мотаныт рүпитасыт. Ань о́лнэ учителит ос тот ханищтахтын нъяврамыт тәнаныл ат ёрувляныл.

Ты потыр Нъярихумит пәвыл школат рүпитан нэ Лариса Карпенко кётыстэ, маңьщи ләтңыл Николай МЕРОВ хансыстэ



9 МАЙ – ПОБЕДА ХӨТАЛ!

Мāньщи нэг Тихвин үсн ялсыг

Хальүс район
Мөнхквъя
павылныл
олум мāньщи
хум Александр
Васильевич Алгадьев
1942 тал вāt сāграпнал
этпос 29 хөталэт
Ленинградский
областит хөнтлым
порславес.

Щёмьянылт Алек-
сандр шар яныг пы-
гыг олыс. Тав шāняге-
ацаге Василий Алек-
сеевич ос Анна Андре-
евна Алгадьевыг ат
нйврам ошсыг. Атятэ
1940 талт āтимыг ём-
тыс. Төнт Александр 23
тālэ төвлыс, āпшияге
Илья ос Владимир иң
мāниг олсыг. Анна
Андреевна 1950 талт
āтимыг ёмтыс, пыгыг
увшитён Прасковья
Васильевна Алгадьеван
янмалтавесыг.

Илья ос Владимир
Алгадьевыг нйврама-
нэн ань Хальүс рай-
он Хулюмсүнт пāвилт
өлэгыг. Тāн акияныл
Александр Васильевич
хоты мāt ёл-щёпита-
вес, сāv тāl аты вāса-
ныл. Ты тāl Илья Ва-
сильевич яныг āгитэ
Анна Назаренко (Ал-
гадьева) ишхипын ут



Хулюмсүнт пāвилт өлнэ памятник

ширыл кискхатункве
патыс, ос тав ёл-щё-
питым мātэ хөнтыстэ.
Ты урыл Анна таи по-
тыртас:

— Аким урыл по-
тыр ам интернетыг
«Мемориал» нам-
па лопсыт хөнтыслум.
Тувыл опарищ наме
«Алгатъев» хасвес. Пёс
нэпакт тох хансыма:
«Рядовой-стрелок —
Алгатъев Александр
Васильевич, өлнэ мāt-
тэ: «Омский область
Берёзовский район,
Нахсемвольский с/с,
Хатумвольский кол-
хоз». Тав 125 ЗСП нам-
па ротат хөнтлас. 1942
талт вāt сāграпнал эт-

пос 29 хөталэт пүль-
ницат āтимыг емтыс.
Ленинградский обла-
стит Тихвин үст ёл-
щёпитавес».

Ты пёс нэпак ши-
рыл похоронка ам
āтямн, Илья Василье-
вич Алгадьевын, кёт-
вес. Ос аквты лопсыт
хури кāsаласлум, тот
āхвтас тармыл аким
наме хансым олыс.
Нэпак ёмашакв сун-
сыгламум ос ловинь-
тамум юи-палт тāра
торгамтаслум, тав ёл-
щёпитым мātэ та хөн-
тыслум. Ты юи-палт
та үсн ялуңкве щё-
питахтасум. Аким ёл-
щёпитым мātэ руц

лātныл «Братское клад-
бище» намаим олы.
Яныг хөнтлан нак по-
рат тот кит сōтыра 742
хөнтлам сālтатыт ёл-
щёпитавёсыт».

Яныгпōль этпос 24-
25 хөталыгт Анна Ильи-
нична Назаренко ос
Татьяна Владимировна
Куприянова (Алгадье-
ва) Тихвин үсн ялсыг.
Тэнки өлнэ пāвлэныл
мā-лөмт ёт-тотсыг ос
акитён ёл-щёпитым
мā пōхыт тув лāкква-
расалтастэн.


Хулюмсүнтыт пā-
вылкан котилыт пāнт
āхвтас тўщтым олы,
яныг хөнтыт пōрс-
лым мāхмыт наманыл
тув хасвёсыт. Алгадьев
Александр Васильевич
ос Алгадьев Пётр Ни-
китич намагён ос тот
хансым өлэг. Пāвлын
мир касын тўя Победа
хөтал кастыл та āхв-
тас пōхат акван-ат-
хатыглэгыт ос нётнэ
лүптат тув пинэгыт.
Алгадьевыт рўт мā-
хум тāнки акияныл
кастункве тув ос акваг
ялантэгыт.

Людмила
АЛГАДЬЕВА

А. И. Назаренко ос
Т. В. Куприянова

Исходные данные к плану «Операция «Битва за Ленинград»									
С 1-го августа 1941 по 1-е мая 1942 года.									
№	Имя, фамилия и отчество	Дата рождения	Дата смерти	Место рождения	Место захоронения	Служба	Звание	Награды	Примечания
1.	АЛГАДЬЕВ Александр Васильевич	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Рядовой	Стрелок		
2.	АЛГАДЬЕВ Анна Андреевна	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Сестра милосердия			
3.	АЛГАДЬЕВ Александр Васильевич	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Рядовой	Стрелок		
4.	АЛГАДЬЕВ Анна Андреевна	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Сестра милосердия			
5.	АЛГАДЬЕВ Александр Васильевич	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Рядовой	Стрелок		
6.	АЛГАДЬЕВ Анна Андреевна	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Сестра милосердия			
7.	АЛГАДЬЕВ Александр Васильевич	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Рядовой	Стрелок		
8.	АЛГАДЬЕВ Анна Андреевна	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Сестра милосердия			
9.	АЛГАДЬЕВ Александр Васильевич	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Рядовой	Стрелок		
10.	АЛГАДЬЕВ Анна Андреевна	1910	1942	Омская область, Берёзовский район, Нахсемвольский с/с, Хатумвольский колхоз	Ленинградская область, Тихвинский район, кладбище «Братское»	Сестра милосердия			

Эрыг тотнэ хум



Касың тўя Белоярский район Касум павылт сáлың махум мағыс касыл вáрыглаве. Тынакт сосса мир ос мўй махум тув ос та атхатыглáлсыт. Тán халанылт эрыг тотнэ ханты хум олыс, наме Валентин Валерьевич Вальгамов.

Тав ханты, мáньщи ос руш лáтңыл эрги. Турсуетатемнётнэ, эр-гуңкве паты, эрганэ вит холыт овумлэгыт, хосан суйтэгыт. Валентин Валерьевич Салехард ўст Ямальская филармония намба культурно-деловой центрыт рўпиты.

Хум китыпласлум, хоты рўтныл олы, эргуңкве хунь патыс. Нán ань элалъ тав потре ловинь-тэлýн.

— Ам Саня я вáтат самын патсум, Овгорт павылт яныгмасум. Вальгамовыт — ты Саня хан-

тыт опарищ нам. Áтям Валерий Иванович тувыл ты олы. Тав ань Овгорт павылт тренерыг рўпиты, нýврамыт ёсал хайтуңкве ханищтыянэ.

Ань тыт Касумт мирн ванэ тáксар ханты хум олы — Александр Павлович Тасьяманов, тэн хумыг-ўиг ёмтмён порат Салехард ўст аквэ́т ханищтахтасыг, ёсал хайтыгтасыг.

Омам Шурышка-Оры мáныл олнэ нэ, школат овыл клас-сытыт нýврамыт ханищтым рўпиты. Опам ос ащóйкам сáлы ўрим



яласасыг, хўл алыщласыг, вóраясыг.

Щащёквам сака нётнэ́г эргыс, ам ос мáнь тағыл эргысум. Школа áстламум юи-пáлт Салехард ўс педучилищат физкультура учителяг ханищтахтасум. Та порат ос акваг эргысум, сосса махманув ёт хóтáти эргим яласасум.

Хунь армияныл ёхтысум, тáра Салехард ўсн минасум, культурный центрын патхатасум. Тот нýврамыт ёт рўпитэгум, пёс сáңквылтапыт ханищтэв, йильпииг щёпитыянўв, эргёв, ййквёв. Юил ялан-тым Тюмень ўст олнэ академия áстласум. Ямал мáт ос нán округынт олыглан тамле ялпың хóталытн ам акваг ялантэгум, эргёгум.

Валентин Валерьевич овлёт кон эргыс, ётыл клуб колт нóх-патум махум яныглавёсыт, тав тот эргыс, ййквыс, тўлыглапыт суссылтас, «Мелодия обских рыбаков» тán сáңквылтас. Тувыл мáньщи лáтңыл хурум эрыг эргыс: «**Алпыл сэрипос**», «**Кўринька**» ос «**Куккук нёлме толаяс...**»

Хум лáвыс, ты эргыт ос тáныт тав Владимир Шесталов палт хўлса-

нэ, тувыл ханищтасанэ. Хунь мирың мán ялы, акваг эргиянэ. Хум шар мáньщи хóтпа хурипа, мán лáтңанув татем ёмашакв лáвиянэ, эргиянэ.

Руш лáтңыл сака ёмас эрыг вáрыс, тох намая-стэ: «По тундре, заснеженной тундре...» Ты эрге овлёт кон эргыстэ, павыл янытыл улпыл кáсың сáмт суйтыс. Тувыл юн ос вóваве, вус эргитэ.

Валентин Валерьевич лáвме щирыл, тав сáлы ўрнэ махум касум мán омагён-áтяген мáнь тағыл то-тыглавес, тот сунсыс, хумус махум касэгыт, мўй мир ёмыгтэгыт, акван-хóнтхатэгыт, щáгтэгыт. «По тундре, заснеженной тундре...» эрге ты урыл ты олы, мóлты хансыстэ, тáныл ос Тарко-Сале ўст олнэ хум Юрий Леонтьев тав вáрыстэ.

Валентин Валерьевич тох лáвыс:

— Пуссын пустағыл олэн, пёс йис культурав нóх-вóрмалтэн, нýврамыт щáнь лáтың вос ханищтэгыт. Мáньщи ос ханты лáтңагув сáв нот элалъ вос суйтэ.

Светлана РОМБАНДЕЕВА



С. П. Канев ос В. В. Вальгамов

ХАНИЩТАП

Восыңтұр нъяврамыт мōйтыт суссылтасыт



Восыңтұр пāвылт ѓлнэ нэ Светла-на Павловна Собянина мāн «Лўимā сєрипос» газетавн пицма кєтыс. Тот тамле ляххал хансым ѓлыс:

«Мāн школавт «Те-атр мансийских и хан-тыйских сказок» нампa фестиваль вāрыгла-вес.

Ты тєла нъяврамыт єт Антонина Павлов-на Глушанкова, так-ви ѓпарищ наме Ме-лентьева, щєпитāлыс. Тав руц ос мāньщи лāтың ханищтан нєг школат рўпиты. Тāн ань

сāвсыр мōйтыт єнги-лыг вāрсаныл ос мўй мāхумн суссылтасаныл.

Овыл классыт ханищ-тахтын нъяврамаквет «Сāснєл» мōйт суссыл-тасыт, китыт классыт ханищтахтын āгири-щит-пыгрищит — «Сѓ-выркве», хўрмит клас-сыт — «Куккук» мōйт, нилыт классыт — «Хўрум сāграп», атыт класс —



Мōйтыт суссылтам нъяврамыт

«Таңхєгум, ат таңхє-гум» ос хōтыт классыт ханищтахтын āгит-пы-гыт «Охсар ос лунтыт» мōйт суссылтасыт.

Ты элы-пāлт пєс мāх-манув лāвыглам лāтың пуссын хўнтлысыт: «Вит, тѓрум, мā — хѓт мāн ѓлєв, маныр кāсa-лєв, пуссын мāн мāг-сылув лылыңыг ѓлє-гыт. Мōйт ѓс лылың, тав ўйрищ хольт тыгле-тувле тыламлым яла-сы, ань мāн палтув ты йсы».

Пєс порат нъяврамыт мōйтыт хўнтлым яныг-масыт. Ты хосыт пєс мāхум мўтран ос мā-вит ўргалан накин тāн ханищтавєсыт. Хумус мā ўнтхатас, хумус ят, тўрыт ос ўйрищит, вѓ-руит нєглысыт — пєс мōйтыт щирыл ты вāрмалит нъяврамыт вāңкве патсыт.

Тувыл мōйт хосыт нъяврамыт сымың, ємас хѓтпаг ѓлуңкве ха-нищтавет. Мā-вит вос эруптыяныл, ўргалыя-ныл ос мѓт мирыт єт юртыңыщ вос ѓлєгыт. Мōйтыт тѓванакт оц-

хуль вāрєгыт, ємас вāрмалитнѓх-паттєгыт, лўлиг ѓлнэ накытыл мовиньтєгыт.

Ань пуссын тамле тєлат мōйт хосыт сус-сылтавєсыт. āгирищит-пыгрищит ємщакв єн-гысыт, тāн сāвсыр мас-нутыл масхатасыт, тув эрнэ пормас ѓс ѓщ-сыт. Тувыл ты єнга-ныл ѓвылтыт Антони-на Павловна єт потыр-тасыт. Тāн тєланыл мā-кыг вāрсаныл, юв ємас номтыл лāкква-ми-ныгласыт.

Школат щāнь лāтың урокут янас щєсыг вāравет. Нъяврамыт сы-ресыр пормасыт, мас-нутыт, ўйхулыт хумус лāвавет, ханищтєгыт ос нєпакн лātңыт хан-сєгыт, тув хурит пѓс-лєгыт. Тувыл мāньщи эрыг эргєгыт, мōйтыт мōйтєгыт, āмщит āм-щєгыт. Тамле щāгт вāрнєныл сыс мāньщи лātңыт молях торгам-тыяныл ос ханищтыя-ныл.

**Светлана Собянина
потре мāньщи лātңыг
Т.Мерован хасвес**



А. П. Глушанкова котилът лўли

Мāхум мўйлуңкве вōвыглавёсыт



«Ма Мувем» нэквет



Төр-лөмт йивн нэгсалёгыт

Ювле хультум этпост касың яныг ўст ос мāнь пāвылквет сосса мāхум «Ўринэква хōтал» янытласыт. Ты ялпың хōтал Хāльўст ѓс вāрыглавес. Районный культура колт рўпитан хōтпат пāвылт ѓлнэ мир мўйлуңкве вōвыгласаныл. Āлпыл мāньщи, ханты хōтпат Аяс Тōрум ос Калтащ Щāнь нупыл пōйкшасыт.



Няврамыт касёгыт

К. Сурун кетум хурит

Ты юи-пāлт ялпың хōтал ѓвылтахтас. ѓвлэт мўйлын мир Хāльўс район миркол кўщай Владимир Фомин янытласанэ. Касың щёмьян пустагыл, сōтыңыщ, щуниңыщ ѓлуңкве лāвсанэ. «Югра лылыёп» намба организация Хāльўс отделениятѓт кўщайг ѓлнэ нэ Любовь Кашлатова мāхумн сāv ёмас сымың лāтың лāвыс. Пёс порат ханты мāхум ты хōтал хумус янытласыт, та урыл потыртас.

Мўйлын мāхум мāгсыл Влада Захарец сāңквылтапыл сāңквылтас, «Ма Мувем» намба ансамбль мāньщи ос ханты эргыт эргысыт.

Мāньщи ос ханты мирыг сāv ёмас, мўтраң мōйтыт ѓныщёгыт, тāн няврамыт сымың, кārкам, пилтāл ос ёмас хōтпаг ѓлуңкве ханищтыяныл. Культура колн ялантан āгирищит-пыгрищит «Вōнтыр ос сōрни кāнащ» намба мōйт тот суссылтасыт.

Хāльўст «Ўринэква хōтал» янытлан порат «Национальная кухня» намба фестиваль вāрыглавес. Ялпың

хōтал кастыл мāхум мāньщи ос ханты сōламат, хўлыңнянь, ёхул, пилыңнянь ос мōт тәнут тув тотсыт. Тāн халанылт касыл ѓлыс. Тот нōх-патум хōтпат янытлавёсыт, диплом-нэпакыл ос мўйлупсал майвёсыт.

Няврамыт «Порни-порни, нёв-нёв» намба ёнгилыл ёнгалтавёсыт. Ос пўмыщ касылыл вāрыглавёсыт. Мāхум ёсал хāйтсыт, сāлың сун ўлтта поргысыт, тыньщāң пāхвтысыт ос мōт сāv щирыл кас-сыт.

Ты юи-пāлт «Ўринэква хōтал» янытлан мāхум пасан вāтан вōввёсыт, тот хўл исмитыл ос щāил айтвёсыт. Кāсащан хōтпат хāльн тōр-лөмт нэгсаласыт.

Хāльўст ѓлнэ мир ты ялпың хōтал урыл ёмашакв вāгыт, тымāгсыл «Ўринэква хōтал» янытлаңкве кāсың тўяг акваг сāv мир ёхталы.

Калерия Супрун
кётум потре мāньщи
лātңыл Людмила
ТЕТКИНА хансытэ

9 МАЙ – ПОБЕДА ХОТАЛ!

Шайтанка павыл салтат номаве



Орден «ОТЕЧЕСТВЕННОЙ ВОЙНЫ I СТЕПЕНИ»	
5. Гвардии лейтенанта МАТЧЕНА Василия Ивановича.	Командир сапёрного взвода 245 Гвардейского Стрелкового полка.
6. Гвардии рядового ПОПОВА Анатолия Васильевича.	Гавардичка-наблюдателя штабной батареи 136 Гвардейского артиллерийского полка.
7. Гвардии лейтенанта ОЛЕКСИКО БОРИСА Фёдоровича.	Командир пулемётного взвода 2 пулемётной роты 243 гвардейского стрелкового полка.
8. Гвардии старшего лейтенанта ПУШКАРЬ АНДРЕЯ Фёдоровича.	Командир 3 батареи 136 Гвардейского артиллерийского полка.
9. Гвардии лейтенанта СААДИН АБГАР Александровича.	Командир пулемётного взвода I пулемётной роты 243 Гвардейского стрелкового полка.
10. Гвардии капитана СЕГОВА Степана Фёдоровича.	Командир 9 батареи 136 Гвардейского артиллерийского полка.
11. Гвардии старшего сержанта ЧАТКОВА Тимофея Кузьмовича.	Командир орудия батареи 45 мм пушек 247 Гвардейского стрелкового полка.
12. Гвардии старшего лейтенанта ПРЯЖОВА Алексея Сергеевича.	Командир стрелковой роты 245 Гвардейского стрелкового полка.
13. Гвардии капитана ЧУПРОВА Александра Емельяновича.	Командир стрелковой роты 245 Гвардейского стрелкового полка.

Победа хотал янытлан кастыл Александр Емельянович Чупров, яныг хонтит порсум маньлат пыг, урыл потыр хансэв. Ты потыр Хальбуст олнэ рутанэ маньци газетан кэтсыт.

Война овылтахтам порат Александр Чупров тара хонтланкве тотвес. Овлэт тав военный училищат ханищтахтас, тувыл Западный фронтын хонтланкве кетвес. Пилтал хонтламе магсыл «Орден Отечественной войны» ос «За отвагу» намба маглын тагатам посыл майвес. Тав 1945 тал яныгполь этпос 9 хоталэт порслувес. Тав Кёнигсберг үст яныг ахвтас тармыл наме хансым олы.

Оматэн хансыглам пицманэ рутанэн ань тыг мус оныщавет. 1944 тал сукыр этпос 24 хоталэт Александр хансыс: «Ома, ань хонтланкве щёпитахтэв. Фашистыт Берлин үс нупыл нявлянув, атам ос мот порсум махманув магсыл пуссын тананыл алуңкве патыанув. Победа хотал та үст яныгланкве патэв. Ос ты юи-палт ам юв тах ёхтэгум».

Галина Емельяновна Чупрова такви каңке урыл «Жизнь Югры» намба газетан «Для нас он остался Сашей» намба потыр кетыглас. Галина Емельяновна сав тал школат няврамыт ханищтан нэг рупитас,

мүтран ос сымын хотпаг олыс. Каңке ос аятэ хурит, нэпакыт пуссын акв мат ошсанэ. Акв хурит каңке послым олы. Та хуритэ тав оматэн Прасковья Васильевна Чупрован кетыглас, тот хансым олыс: «Нап пыгын старший лейтенант Александр».

Тав «личное дело» намба нэпаке копиятэ рутанэн ань ос оныщаве. Ты нэпак яныг таквс этпос 1942 талт ты щирыл хасвес: «Александр Емельянович Чупров вёртур этпос 1922 талт Омский область Шайтанка павылт самын патыс. Сат класс Шайтанкат асталас.

1941 талт ойгтур этпос 23 хоталт повестка-нэпакыл кетвес. Тувыл М.Ф. Фрунзе намба военный училищат хот этпос ханищтахтас ос ты юи-палт хонтланкве тотвес».

Мот потыр тав уретыл 1982 талт Н.Е. Филиппов хансыглас. Потре Хальбус районный музейн ос Александр Чупров оматэн кетыстэ. Тот хансым олыс: «Война порат сав хотпат хонтлым порславёсыт, тан халанылт капитан Александр Чупров олыс».

Ты хум сав нэпак А. Чупров урыл акван-атыс. Хот ос хунь ты маньлат пыг порславес, ты урыл савсыр нэпакыт потрыт кинсыс, ты урыл тох тав хансыс: «Вёртур этпос овыл хоталэт 1944 талт Александр Чупров «гвардии капитан» намыл майвес. Тав такви салтаганэ ёт щар овлэт Восточный Пруссия ман ёхтыс.

Тонт тав оматэн тох хансыс: «Ятил омам! Ань атам магсыл ос пуссын махманув магсыл тыт хонтлэгум. Лов хотал сыс тыт хонтлымав ман вагтал патсув. Холытан Кёнигсберг үс тах виңкве патылүв».

Яныгполь этпос Александр Чупров такви махманэ ёт Прегаль я ултта унсысыт. Тонт ты маньлат пыг хоттал та тотвес.

Аквта этпос 15 хоталэт полковник Корovin Прасковья Васильевна пицма хансыс: «30614 воинский часть нэпак хансы, нан пыгын Прасковья Васильевна, пилтал хонтлуме магсыл «Орден Отечественной войны I степени» намба маглын тагатам посыл миве».

Победа хотал 60 талэ товлын кастыл «Жизнь

Югры» газетат Александр Чупров урыл Анатолий Белый «Погиб под Кёнигсбергом» ос акв потыр хансыс.

Потрёт тамле латныт олсыт: «Калининград үст хонтланакт порсум махум памятникыл вэрвёсыт. Та мат 1 сотыра 200 салтатыт ёл-щёпитым олэгыт. Алексей Емельянович Чупров, Шайтанка павылныл олум маньлат пыг, ос та мат ёл-щёпитавес. Тонт тав 22 талэ туп товлыс.

Приказ-нэпакт тох хасвес: 1945 талт яныгполь этпос 15 хоталэт Александр Чупров «Орден Отечественной войны I степени» намба маглын тагатам посыл миве. Ты юи-палт оматэ похоронка-нэпакыл тотвес.

Прасковья Васильевна Чупрова 30 арыгкем тал ювле хульгум юи-палт пыгнэ маим посыл ушта кетвес. Орден Хальбус районт военный комиссарыг олум хум Б.И. Решетников тавён мистэ. Ты маглын тагатам пос катыт пувим оматэ сака хоса люньщис.

**Марина Табун кетум
потре маньци латныл
Людмила Теткина
хансыстэ**

9 МАЙ – ПОБЕДА ХӨТАЛ!

Тан хонтлам рутаныл урыл потыртасыт

Ман округувт 2019 тал Щёмья янытлан талыг нама-явес. Касың павылт ос үст ты кастыл савсыр суссылта-пыт, хонтхатыглапыт, ялпың хөталыт вәрыглавет.

Хальүст нәпак ловиньтан колт щёмья янытлан кастыл ныврамыт конференция атыглавёсыт. Агитпыгыт танки опаныл, ащойканыл ос мот ляпа рутаныл урыл потыртот ловиньтасыт. Варя Т. такви рутанэ урыл потыр ос хансыс. Агириш ань сатыт классыт хаништахты ос нәпак ловиньтан колн акваг яланты. Ты потыр оматэн Мария Ана-тольевна щёпитаңкв нётвес.

Варя хонтлаңкве ялум ойкаг Алексей Филиппович Отшамов ос Алексей Ильич Павлов урыл потыртас. Алексей Филиппович тав анёкватэн Нина Филипповна Малугинан каңкыг олыс.

Агиришакве тох хансыс: «Алексей Филип-



пович Пугоры павылт 1925 талт яңк нәтнэ этпос 10 хөталт самын патыс. Война элы-палт хул алышлан ос воряан хөтпаг колхозт рупитас. Хонтлаңкве 1942 тал порат тотвес. Тав Берлин мус ялыс.

Яныг ойка хонтлам поратэ урыл сака ат потырталыс. Акв порат туп тав лавыс: «Повестка-нәпакыл 1942 талт кётвёсум. Овлэт писалил пәтлуптаңкве хаништавёсум. Тувыл тәра Киев үсн хонтлаңкве тотвёсум. Төнт Г. К. Жуков 64 девизият генерал-лейтенантыг олыс. Акв щёс таве тот кәсалалыслум.



Киев үс пөхат сакватавёсум, ты юи-палт Хабаровск үсн пусмалтахтуңкве кётвёсум. Ёмашакв хунь пусмысум, элалы хонтлаңкве миначум.

Алексей Филиппович нёмса, ёмас, сымың хөтпаг олыс. Экватэ эт нёлолов ныврам янмалтасыг. Война юи-палт колхозт сав тал рупитас. Хонтламе ос сав тал кәркамыг рупитама магсыл магылн тагатан сав пөс, янытлан нәпакыт онышас.

Ам щашёквкам Надежда Алексеевна Табун аще ос хонтлаңкве ялыс. Тав наме Алексей Ильич Павлов олыс, Туль-

ский область Задонщина павылт вөртур этпос 21 хөталэт 1926 талт самын патыс.

Алексей Ильич 1943 талт хонтлаңкве вуйвес, финский фронтын кётвес. Тот туп хурум этпос хонтлас, тувыл акв ләгле сакватавес ос хот-яктувес, ты юи-палт юв та кётвес. Хонтлан нак юи-палт нә тотыс. Экватэ эт хурум ныврам янмалтасыг. Пенсиятэ мус колхозт рупитас.

Яныг опам 1999 талт атимыг ёмтыс. Ам омагум-агтягум эт тав олум павлэн касың тал ялантәлэв. Тав хуриянэ, нәпаканэ, магылн тагатан пөсанэ ўргалым онышиянүв. Ман щёмьявт Алексей нам сака янытлаве. Рут махманув халт 12 элумхөлас тамле нам ань оныщёгыт. Тан пуссын Алексей Ильич ос Алексей Филиппович янытлан магсыл тох намтвёсыт.

Ман яныг щёмьявт хонтлам рутанув номавет ос сака янытлавет».

**Марина Табун кётум
потре маныщи ләтңыл
Людмила Теткина
хансыстэ**



9 МАЙ — ПОБЕДА ХӨТАЛ!

Ищпан аки

Лай, наң-а ӧнѡшам ӕрыгкен
Лай, ӕнумна-а хулиглӕлыын,
Ӕнумна-а мишинтӕлыын-а.

Ӕрыг-соваткен мӕнъ мӕгыс-а,
Улы-соват мӕнъ мӕгыс,
Яңкнӕл хӧптыл мишинтылум,
Яңкнӕл хӧптыл мыглума-а.


Ӕрыг-кӕна ӕнумн
хулиглӕлыын-а,
Улы-совкен вос хульты.
Руц хӧнтыг-а люлиken-а,
Руц хӧнтыг-а минӕкӕн-а,
Ӕрыг-кӕна ӕнумн
хулиглӕлыын-а,
Ӕрыг-кӕн ӕнумн маӕлыын-а.

Ищпан аки ӕлаль-а тава улылам
ӕрыгкӕтӕ,
Ващка Щӕман акиювнаг-а
Сӧля ювле хультыглам,
Сӧля таве хулиглыме,
Кай-руц хӧнтыг-а сӧль минас.

Ӕн-я ӕква яныг пыгрищ,
Ващка ӧйка яныг пыгрищ,
Ӕрге ювле сӧль хультыс-а,
Улытӕ сӧль юв хультыс.

Ӕпшииг халӕнт потыртасыг:
Кӕпъя Ващка кит пыг, Ищпан ос
Щӕман Самбиндаловыг Искар-
ский пӕвылныл.

Щӕман ӕрыгсов каңкеныл
вӧви: «Ам наның ӕрыг мӕгыс



яңк сӕлы мыгум. Наң вой-
нан вӧвавӕн, ӕргын тах хуль-
ты».

Тӧнт тӕн хунъ вӕсыг, юи-ӧвыл
щӕс потрамасыг. Ищпан 1909
тӕлт самын патыс, армиян 1939
тӕлт лусытаңкв вӧввес, финс-
кий войнат хӧнтлас. Юв мощ-
щан ӕхталас, 1941 тӕлт хӧнт-
лаңкв ӧс та тотвес. 1943 тӕлт
Сталинградский фронтыт порс-
лавес.

Хурум нӕврам хультсыт. Акв
ӕгитӕ Дарья Степановна Сам-
биндалова мӕныщи мойтыт, пӕс

йис потрыт вӕнӕ хӧтпаг ӧлыс,
учӕныит халт вӕйвес.

Щӕман 1911 тӕлт самын па-
тыс, исколататханищтахтас. Тав
ӕтыл 1943 тӕлт войнан вуйвес, ты
ӕлы-пӕлт сӕлы урнӕ хӧтпаг «Ки-
ров» нампӕ қолхозт рупитас. Тав
Ленинград уст ос Ӕстония мӕт
хӧнтлас.

Хунъ «Петр Шлеев» нӕиңхӕпыл
ӕхтыс, пӕвлың мирн шар ат
хащвес, янытӕтыл лап-пӕрима
ӧлыс. Щӕне такви пыге туп
ханьщистӕ ос лӕлыт ӕмантас.
Щӕман пӕльницат нӕпаканӕ
хот-тӕлмантавӕсыт. Тыт кӕщаит
лӕвыгласыт: «Вӧраян мӕт тох
сакватахтасын».

Сӕв сӧрпит, хӕйтнут кӕтын-
паттыглас. Яныг план қолхоз
мӕгсыл вӕрыс. Акв нӕлыл аквто-
рыг кит хӕйтнут алуңкв вӕрмыс.
Сӕлы урнӕ хумыг рупитас, хоты
сӕлы паль пӧс щирыл лӕвуңкв
вӕрмыс. Вӧрт ӕсал ӕмыс, лӕңхе
ат хультыс, такем молях, кӕстыр
хумыг ӧлыс. Та пилыщмаң
нюлмиянӕтыл савалым 1966 тӕлт
ӕтимыг ӕмтыс.

Сӕт нӕврам яныгмас, так-
ви торыг ӕрге хультыс, ӕргавес.
Ӕрганӕ ос ӕрыгсовыт мӕн ань
мус хулыглыянӕв, ты улылӕ
ӕпшитӕ ӕги Галина Констан-
тиновна Алгадьева ӕрги.

Наталья ТАСМАНОВА

Тав тӕн сӕңквылтам хумыг ӧлыс



**Ты тӕл яныгпӧль ӕтпос
28 хӧталӕт тӕныт
сӕңквылтам мӕныщи хум
Владимир Иванович Ше-
сталов ӧлыс те, 55 тӕлӕ
тӧвлынув. «Тӧрум Маа»
музейт рупитан мӕхум
таве кӕстысаныл, тув
мӕхум атхатыгласыт,
сӕв ӕмас, сымың лӕтың
лӕвсыт.**

Владимир Иванович 1964
тӕлт Тюмень уст самын патыс.
Атытӕ мӕныщи поэт Юван Ни-
колаевич, омаӕт Ӕлизавета
Владимировна ӕги-пыгӕн ӕт
та уст 1971 тӕл мус ӧлсыг, ту-
выл щӕмьяныл Ленинград уст
вӕнтлыс.

Владимир Иванович та яныг

уст яныгмас, школа ӕстлас, ар-
миян ялыс. 1987 тӕлт тав Ханты-
Мансийск уст ӕхтыс, педучили-
щат ханищтахтас. Тыт мӕны-
щи мирув тӕныт ос ӕргыт
ханищтаңкве патыс. 2001 тӕл
порат Петрозаводский консер-
ватория ӕстлас, тот тав ӕрыг
вӕнӕ яныг хӧтпат ӕт вӕйха-
тас.

2011 тӕлт Владимир Ива-
нович искусствоведение кан-
дидат намыл майвес. Вӕтах-
тем тӕл тав мӕныщи тӕлыгла-
пыт, тӕныт, ӕргыт ос йиквыт
ханищтас, ты урыл хурум нӕ-
пак хансыс. Хум ӕлаль ӧлыс те,
сӕв ӕмас, ӕрнӕ тӕла иң вӕрнув.

**Светлана
РОМБАНДЕЕВА**

ХАНИЩАП

Ты латһыл туп 300 хөтпа потырты

Светлана Нереевна Жовницкая, аҕи Сопарищ наме Турдагина, Красноярский край Таймыр нампa мaт олы. Тав мөлты этпост мaн үсүвн ёхталас, мирхал форум нампa сапрaнит такви мире урыл потыртас.

Тaн aнһ мoщцaг хультум мирaныл тох лaвaвe — нгaнaсaны, туп сaтсaт хөтпa aнһ хультыс. Таимaгыс Светлана Нереевна сымe сaкa щaрги, тaв хөт-aти сaвсыр яныг сапрaнин ялaнты oс ты урыл aквaг пoтырты. Тaв aнһ тох лaвыс:

— Мaн мирув хaлт туп хурумcаtтeм хөтпa щaнһ лaтһувтыл потырты. Шкoлaтт 76 нaврaм нгaнaсaн лaтһув хaнищтыяныл, мaнһ нaврaмыт кoлт oс 41 нaврaм.

Aнһ тох лaвуңкв тaнхeгум, юи-oвыл тaлытт мoщцaг хультум coccа мирыт тaнти oлупсaныл, тaнти щaнһ лaтһaныл элaль тoтнэ урыл нoмcах-туңкв тa пaтcыт. Тaн тaнти лaтһaнылтыл пoтыртaнкв aт тe пaтэ-гыт, лaтһaныл тa cөймeгыт. Мaн мaхмaнув aнһ пoтырсуяныл тa сумыллaсыт. Хoтьют вeрми, aт вeрми, тaкви щaнһ лaтһeтыл тох тa пoтырты.

Aм 45 тaл шкoлaт нaврaмыт хaнищтым

oс ты кoнһпaл хaнищ-тaхтын нeпaкыт хaн-сым рупитeгум. Рупи-тaнкв oвылтaхтaмум пoрa aм ты яныг тaр-витың вaрмaлын яр-мысум — шкoлaнувт нгaнaсaн лaтһув щaр aт хaнищтaвeс, щaр aкв хaнищтaхтын нeпaк хaнсым aт oлыс. Ты рупaтaн aм тa вуй-хaтaсум.

1999 тaлт oвыл бyк-вaрь-нeпaк ты тaрaтa-вeс. Бyквaт хумус хaн-суңкв, aмти тa нoмыл-мaтcанум. Тa пaсныл aнһ ты хөтaл мус oвыл клaссныл 9 клaсс мус учeбникыт пycсын aм хaссaнум. Aнһ яныгмaн нaврaмыт шкoлaт oс cадикт мaнти щaнһ лaтһув мөт хөн лaтың хoльт хaнищтыяныл. Тaнaнылн нгaнaсaн лaтһыл пумыщ пoтыр-тaнкв.

Пeс пoрaт мaн мaх-мaнув oс caлы oщcыт, caлы урим ялaсaсыт, ёрнкoлт oлcыт. Aнһ ты хөтaл мус щaр aкв хөт-пa caлы aт oнһи. Пyc-сын пaвлытт oлeгыт, мoтopхaпыл oс «Бурa-ныл» ялaсeгыт. Maнти мaснyтaнувтыл нeмхo-



С. Н. Жовницкая

тыют aт мaсхaты, нeк-вeт aт юнтeгыт.

Oс aнһ яныг кyщa-нув мaнaвн eмaщaкв нeтyңкв пaтcыт, ты хo-сыт coccа мaхмaнув лaтһaныл янытлaнкв пaтcaныл.

Нe пoтыртaс, aквмaт-нaкт Нoвocибиpск yсн яныг кoнфeрeнци-ян ялыс. Тoт aкв хoт-ты мoщцaг хультум мир мaхмaныл урыл пoтыртaнкв вoввeсыт. Тaн лaвcыт, щaнһ лaтһaныл ты cөйми, cа-кa мoщцa хөтпa пoтырты. Cвeтлaнa Нeрeeвнa тaнaныл титыг-лaсaнэ, тaн мирaнылт мaнaх хөтпa хультыс. Тaит ювлe лaвeгыт, тит cөтырaтeм туп. Нe ювлe лaви: «Maн нгaнa-сaн мирув туп caтcаt хөтпa хультыс, хурум-сaт хөтпa пoтыртaнкв вeрмeгыт».

Мeн тaв eтэ пoтыр-тaмyмeн пoрaт тaв тaмлe eмaс лaтың лa-выс:

— Maн aнһ пycсын мoщцaг хультум ми-

рыг лaвaвeв. Тaрви-тың вaрмaлянув пyc-сын aквхурипaт. Oс кaсың мир тaкви мa-ныр рупaтa вaри, тох элaль oлуңкв тa пaты.

Maн мaнти лaтһaнув элaль cүйтнэ мaгыс cав eмaс рупaтa тe вaрeв, элaль oлнэ нoмт тe oнһщeв oс тии мaгыс cав ёр тe пинэв, туп тoнт мaхмaнув щaнһ лaтһув, пeс oлупcав элaль тoтуңкв пaтыя-ныл. Пeс нaкaнув, пeс вaрмaлянув нaврa-мытн хультyтыянyв, cуccылтыянyв. Oс нaс хөт-aти пoтыртaнкв oс aквaг лaвyңкв: «Ми-рув ты xoлы, лaтһув ты cөйми», мaн пycсын вeрмeв.

Taмлe ты тaкcар oс кapкaм нe ёт пoтыр-тaсум. Coль, тaв хoльтэ кaсың хөтпa тe рупитaнув, мaн мaнти пycсын cав eмaс тeлa вaруңкв aлымaнувyв тe, лaтһaнув элaль cүй-туңкв тaх пaтнyвyт.

**Валентина
ВАСИЛЬЕВА**



Мāньщи учёныюв нэпакаге урыл

Евдокия Ивановна Ромбандеева Хёслох пāвылт самын патыс. Тав пāвлэ вой-кан витуп Сакв-я вātат ўнлы. Мāнь тāгыл ханищтахтункве таңхыс, хунь яныгмас, иско-ла āстламе юи-пāлт яныг ўсн минас. Тот сāв тāл ханищтахтас, тувыл ханищтахтам мātēt рўпитас. Мāньщи мāхум нōх-паттын урыл номтэ тох нэмхотталь ат минас. Олнэ сыс ты номт элаль тотыстэ.

Ювле хультум нотт 1950-1960 тāлытт мāньщи лātңыл потыр-таңкве сака ат рōвыс, таимагыс такви лātңе нōх-паттункве тахмаяс. Яныг учёный нэ мāнь-щи мāхум мāгыс сāв эрнэ нэпакыт тāратас. Ты сака тārвитың рўпата.

Такви мāхманэн са-ка эруптавес, тавен ўлылапыт эргысыт. Акв тамле ўлылап Татьяна Романовна Садомина эргащлас. Тав тох эргыс: «Ты ягāги, мāнь-щи āги Хёслох пāвылт яныгмас». Анастасия

Ильинична Сайнахова тав мāгсылэ стихотворение хансыс:

«Тўя котиль этпос порат
Сōтың, пўңың Сакв-я вātат

Такви āще ўнттум колт-а,

Такви щāне ощнэ мāщтыр āпат-а

Мāнь āгикве самын патыс...»

Хотьют ты стихотворение ловиньтаңкве ос эргыт эргащлаңкве таңхи, Татьяна Дмитриевна Слинкина нэпак щёпитас. Тав намаим олы: «Воспоми-

нания о Е.И. Ромбандеевой».

Институтт рўпита-мёт акваг пёс мāньщи вāрмалэ элаль тотыстэ, сака сāв ёмас нэпакыт тāратас. Мāн округувт манырсыр националь-ный школат мāньщи лātың ханищтасыт, пус-сын тав нэпаканэ хосыт ханищтавёсыт. Е.И. Ромбандеева училищат магыс ос нэпак хансыс. Мāн пуссын ты нэпак рўпитан пасант оныщев.

Тāл котиль этпос хў-рум щислат 2017 тāлт Е.И. Ромбандеева āти-мыг ёмтыс. Манырсыр научный рўпата тав тārтуңкве ат āлымас, ётыл тав нэпакаге Ас-угорский институтт вāрвесыг. Тыи «Современный мансийский язык: лексика, фонетика, графика, орфография, морфология,

словообразование» ос «Синтаксис современного мансийского языка» намаим олэг.

Ты нэпакыг инсти-тутыт ос универси-тетыт мāгыс хансым олэг. Мāнылат ос яныг-пāла мāхманувн ты нэпакыг ловиньтаңкве ос рōви. Хотьют нэпакыг такви мāгсылэ виң-кве таңхи ке, мāн ин-ститутувн вос хансы. Тувыл тавен ты нэпакыг мўйлуптавэг.

Евдокия Ивановна Ромбандеева наме ул вос ёрувлаве, вос но-маве, таимагыс тав олум колэн пāрт ху-рип нётнэ āхвтас тар-мыл наме хасвес.

Россият ос мōт хōн мāt тав ань мус ёмас лātңыл номылматā-лаве. Тав такем сёр-ёр, мўтраң хотпаг олыс.

Людмила
ПАНЧЕНКО

Эква сās ёт рўпитаңкве мāкыг хāсы



Ты хурит Прасковья Александров-на Артанзеева пōслым олы. Таве ам туи Шурышкарский район Ханты-Мужи пāвылт мāщтырланэтэ порат пōслыслум.

Эква 1954 тāлт са-мын патыс, омаге-āтя-ге сāлың хотпаг ол-сыг, нёт яласасыг. Тав ань Ямгорт пāвылт олы. Школат Овгорт пā-вылт ханищтахтас, тот нёлотов класс āстлас.

Кāсың туи мāщтыр мāхум рўпитан мāн вōвиньтāлаве. Ань тав нэ хотпат колала пант-нэ сасыт юнтуңкве ха-нищтасанэ. Овлэт сās пāлыт хумус хот-щёпи-таңкве эрэгыт — сус-



сылтас, тувыл акван-сōхтавет ос тащирыл яныг пўт тйвырн, пāй-тахтын витын тāра-тавет. Тох этэ-хōталэ пāйтавет. Пāйтым сā-сыт тākыг ёмтэгыт, мори ат маныгтахтэ-гыт ос ат поклэгыт.

Прасковья Алексан-дровна нёт ос мāнь-лат āгит сасыт акван-юнтуңкве ханищта-

санэ. Ты кārкам э-к-вакве такви рўпитаң-кве āлыми ос мōт мā-хум суссылтыянэ, ху-мус эри — ханищты-янэ. Тав сāв тāл пус-тāгыл вос олы, сāв нэкет такви хāснэ тē-латэн вос ханищтыя-нэ.

Галина
КОНДИНА

Сўкыръя павыл маҳум мўйлысыт

Сўкыръя павылт «Ўринэква хотал» яныгполь этпос сатыт хоталэт яныгтавес. Ты кастыл павыл клуб-кол похат мир акван-атхатыглалсыт, сав хотпа Саранпавылныл ёхталасыт.

Ман ты ялпың хоталув хоталъят, тит щёс порат, овытаслұв. Мўйлың маҳум мағыс сав пўмыщ щёпиталыгласұв. Тан магсыланыл нйврамыт стихыт ловиньтасыт, ёргысыт, ййквсыт.

«Салыкве» намба садикн ялантан мань нйврамаквет маньщи латңыл ёргысыт, «Ам хўл алыщлаңкв минёгум» ёрыг ёргуңкве Ольга Владимировна Лелятова тананыл ханищтасанэ.

«Поиск» намба колт рўпитан нэ Анастасия Албина павылт олнэ агирищит ййквуңкв ханищтыанэ, тан коллективаныл «Шаг вперед» руц латңыл тох лававе. Тан ань ос сака пўмшиг ййквсыт.

И.А.Сметанин Саранпавылт миркол кўчай ваңын хотпаг рўпиты, тавмолтыостыталсамын патум нйврамыт ос тан

оманыл-а́тяныл янытласанэ. Касың хотпа мўйлупсал мистэ, сав ёмас латңыл лавсанэ.

«Ёргын сым» намба маньщи нэквет ялпың хотал порат маҳум савсыр мўтран ханищтасаныл, мирн потыртасыт, мань нйврамыт хумус ўргалаңкв ёрегыт, пормасаныл хумус оныщуңкв ёри.

Петр Анямов маньщи ййкв сака ёмашакв ййквсыт, тав ййквме юипалт мўйлың маҳум катпатта сака хоса ратсыт. Тан ань ваганыл, тох мащтырыг ййквнэ хотпа ань сака мощща. Пёс порат хум хотпат пуссын тох ййквуңкв хассыт, ань Петра нупыл сунсыманыл та хотпат тан ул номылматалсаныл.

Тувыл маҳум каснэ ман воввёсыт ос талаңыл щирыл пуссын лакква-уртвёсыт. Тан сав-



Г.Ларионова кёгум хурит

сыр щирыл кассыт – товт масым хайтсыт, ййв-овыл тит нупыл хартсыт, лаглыгн хұрыг масым поргысыт. Касың нёх-патум хотпа яныгтавес.

Ты ялпың хотал щёпитам хотпат – В.П. Комкова, В.А. Хатанзеев, В. П. Кустышев, П. В. Хозяинов ос И. А. Ломакин, тан манавн акваг нётёгыт. Тананылн, павыл мирко-

лувн, «Сосьва» общинат рўпитан хотпатн яныг пўмашипа латың лавёгум.

Матъёмас тамле ёмас хотпат ёраныл хосыт пёс йис вармалянув, пёс йис наканув ман нёх-вормалтыанўв ос элалъ тотыанўв.

**Галина Ларионова
потре маньщи латңыл
В. Васильева хансытэ**



Лўимā сёрипос

(Северная заря)
№9 (1195), 10.05.2019
Соучредители
Дума, Правительство
Ханты-Мансийского
автономного округа – Югры
Издатель
Департамент общественных
и внешних связей Ханты-
Мансийского автономного
округа – Югры

Редакция

Врио директора –
Кондина Г.Р.
Телефон (3467) 33-22-72

Заместитель гл.редактора –
Кондина Г.Р.
Телефон (3467) 33-22-72

Ответственный секретарь –
Уэль В.В.
Телефон (3467) 33-23-09

Адрес редакции и издателя:
628011, г.Ханты-Мансийск,
ул.Комсомольская, 31
тел./факс (3467) 33-17-52
E-mail: gazeta@khanty-yasang.ru
Газета размещена на сайте
www.khanty-yasang.ru

Отпечатано:
ООО «Новости Югры-
Производство» г. Сургут,
ул. Маяковского, д. 14.

Индексы **04399, 54399**
Тираж **1710** экз.
Заказ **2021**
Цена свободная

Мнение авторов
публикаций не
обязательно отражает
точку зрения редакции.

Газета зарегистрирована
Управлением Федеральной

службы по надзору
в сфере связи,
информационных
технологий и массовых
коммуникаций
по Тюменской области,
ХМАО-Югре и ЯНАО.

Свидетельство
о регистрации
ПИ №ТУ 72-00795
от 23 января 2013 г.